







W 119

27319

15





DISCOVERS

VERITABLE DE LA
PRISE DV COMTE DE SOIS-
sons , avec la deffaicte de ses
trouppes & celles de
Lauardin .

*Par Monseigneur le Duc de
Mercueur .*



A PARIS,

Chez Nicolas NIVELLE, ruë S. Iaques,
aux deux Colonnes.

Et Rolin THIERRY, ruë des Anglois,
pres la place Maubert.

Libraire & Imprimeur de la sainte Vnion.

M. D. LXXXIX.

AVEC PRIVILEGE.

Acc: 65-199.015

VERITABLE

102 10 27 09 79 2:18 p

1875

Shells & Squid


... of ...

should I say, "I am not a Jew?"

61447 A

THE UNIVERSITY OF CHICAGO

218771 G 27



Discours veritable de la prinse du Conte de Soissons, avec la de- faicte de ses trouppes & celles de La- uardin.

Par Monseigneur le Duc de Merceur.

A PRES le massacre de Blois,
 si tost que l'esloignemēt des
 armées de Poictou, sous la
 cōduite du Duc de Nevers & du Roy
 de Navarre (qui avec le seul semblant
 d'hostillité entre elles, estoient au pa-
 ravant sur la frontiere de Bretagne)
 permist à Mōseigneur le Duc de Mer-
 cueur de se mettre aux chāps, pour cō-
 tinuer avec plus d'ardeur & affection
 d'employer sa vie & ses moyens à la
 conseruation de la religion Catholi-

que, Apostolique & Romaine, cōme le besoing en estoit plus grād, le mal presque en son extremité, & les obligations nouuellemēt accreuës, par le fermēt solemnel par luy presté & fait prester en tous lieux de son gouuernement à la S. Vnion, outre le ressentiment que la nature luy donnoit du meurtre de ceux qui luy touchoient de si pres, il assembla le plus de forces que promptemēt il peust mettre fus, & assisté des sages aduis & prudēt cōseil du sieur de Viques Gouverneur d'Auranches & du Mont S. Michel, mesmes de bon nombre de gentils-hommes tant du païs que des circonuoisins, il print les ville & chasteau de Fougères, r'asseura ce qui estoit aucunement alteré aux premieres nouuelles du massacre susdit, & où il ne peust mettre la force en quelques villes, s'assembler tout, & dōner occasion aux

autres qui estoient du party d'auoir
 peur de sentir les mesmes incommo-
 ditez de la force pour pareille seure-
 té, il fut contraint se reposer sur la foy
 (suppleement ordinaire, où la force
 ne peut rien sans trop preiudicier) ap-
 puyant neantmoins ceste confiance
 sous main de quelques homes pour
 la soustenir, si aduenant changement
 restoit tant soit peu de fidelité: qui e-
 stoit tout ce qu'il pouuoit faire pour
 lors.

Delà il alla mettre le siege deuant
 Vitray, où s'estoit retiré grand nōbre
 d'heretiques & polytiques, ayāt sceu
 si promptement leuer la commune
 des enuiron, qu'en fort peu de iours
 il en mist cinq ou six mil à l'entour.
 Il laissa le sieur de Tallouet son Lieu-
 tenāt au siege susdit, enuoya pareille-
 ment le sieur de S. Laurent guidon de
 sa cōpagnie avec mesme charge pour

assieger Iosselin fort chasteau muny
d'une grosse Tour, & se retira à Dinā,
pour estre presque au milieu du pais
& pourueoir sagement à ce qui pour-
roit suruenir.

Là il eust aduertissement que le Cō-
te de Soissons estoit depesché par Hē-
ry de Valois, cōme Lieutenant general
de son armee en Bretagne, pour re-
mettre tout en son obeissāce: ce qu'il
se promettoit faire en peu de temps,
sans cōsiderer qu'il auoit forte partie,
& qui estoit plus versé en son me-
stier que luy.

Mondit seigneur de Mercueur ne
mesprisāt cest aduis, alla à Fougères,
tāt pour en estre mieux certioré, que
pour s'approcher du chemin que le-
dit Comte pourroit prendre, & le re-
pousser s'il se presētoit: où il eust nou-
uel aduertissement, que ledit Cōte de
Soissons & Lauardin son Mareschal

de camp, avec leur cauallerie & infanterie, & quatre pieces de canon estoient desia à Segret, bourg sur la frontière de Bretagne & d'Anjou, & là ayant la riuere entre eux, & mondit sieur de Mercueur, ils festoient logez en seureté.

Ils aduiferent qu'il leur seroit malaisé de passer en diligēce chargez d'infanterie & de canō cōme ils estoient, & pource ils se resolurēt les laisser audit lieu, tandis qu'avec leur cauallerie ils iroient diligēment à Rennes, ioindre les forces qui leur estoient promises par ceux de leur party, pour apres retourner prendre leur infanterie & faire vn gros de tout ensemblement.

Quelques gētils-hommes des environs donnerent incontinent aduis à Monsieur de Mercueur, que l'ennemy estoit en chemin pour tirer ou à Rēnes, ou à Vitray, sans qu'ils le peussent

sent affeurer auquel des deux il vou-
loit aller.

Sur ce douteux aduertissement,
mondit sieur de Mercueur aduifa de
sacheminier à la Guierche, pour estre
près de l'un & l'autre chemin, & se
mettre en teste à l'ennemy quelque
part qu'il voudroit aller, deliberé de
le fuyre plustost iusques aux faux-
bourgs de Rénes, que le laisser passer
sans effect.

Il despescha à ceste fin incontinent
vers ses troupes, & au leudy matin
iour du tressainct Sacrement, donna
leur rendez-vous à Forges, assez pres
de là, où il fust les trouuer, & luy vint
aduiz que l'ennemy l'attédoit de pied
coy au cōbat: ce qui le resiouist fort,
esperant que le bon iour luy appor-
teroit cest heur de faire quelque ag-
greable seruice, à Dieu & à nostre Re-
ligion.

Aussi

Aussi tost il faict marcher ses trou-
pes au lieu où luy fut dict qu'estoit
l'ennemy ; lequel cependant faisoit
diligence extreme de gagner Cha-
steau-giron, distant de trois lieuës de
Rennes seulement, & fait aduâcer les
sieurs de Tallouet, la Chefnaïs, & la
Fontaine, qui menotent les coureurs :
le sieur de Viques suiuoit avec la pre-
miere troupe pour les soustenir, ac-
compagné des arquebusiers à cheual.

Monsieur de Mercueur marchoit
apres, assisté du sieur de Guebrian,
auquel cognoissant ses merites & sa
valeur, il auoit donné sa cornette
blanche ce iour là.

Les Regiments des sieurs de Com-
beronde & de Puy-Greffier suiuoient
le plus diligemment qu'ils pouuoient,
& estant M^{rs}ieur de Mercueur arriué
près dudit Chasteau-giron, où par là
prinse de quelques soldats du Comte

de Soissons qui piquoroïët, il descouurit que ledit Comte repaiſſoit, ſur le ſoir ſuiuant ſa deliberation, & ioyeux de ſe trouuer ſi pres de ce qu'il cherchoit, feit mettre pied à terre à ſes harquebuziers à cheual, pour commencer la charge avec les coureurs.

Le ſieur de Viques, donna dans le bourg d'un autre coſté, ſi courageuſement, qu'il renuerſa ceux qui s'efforçoiët de luy reſiſter & luy faire teſte.

Monsieur de Mercueur ayât diſpoſé ſes troupes aux aduenues, & mis deux Regimēs au deſſus dudit bourg pour rafreſchir ceux qui eſtoient au combat ſi beſoing eſtoit, print quelques harquebuſiers avecq ſa troupe pour les ſouſtenir, & donnant auſſi dans ledit bourg, il rencontra vne barricade faiçte dès lōg temps, dont les ennemis ſe ſeruoient, laquelle il feit attacquer, & fut emportee in-

continent.

Ledit fleur de Comberonde & le Capitaine des gardes de Monsieur de Mercueur, abordas le logis dudit Côte de Soissons, le forcerēt iusques à la chambre où estoit ledit Comte, auquel ledit fleur de Comberonde dict qu'il se rendit à luy, & qu'il luy feroit bonne guerre: dequoy ledit Comte fait refus, disant qu'il vouloit la parole de Monsieur de Mercueur, pour laquelle auoir luy fut permis d'euoyer son Secretaire, qui l'ayant demandee à Monsieur de Mercueur, l'obtint & s'en retourna vers ledit Comte son maistre, lequel sur ceste assurance vint trouuer Monsieur de Mercueur avec les sieurs d'Auaugour, Marquis de Nermoustier, & plusieurs autres Gentilshommes, pour se rendre son prisonnier.

Monsieur de Mercueur ne le voulut

receuoir, qu'il ne luy rēdist son espee qu'il portoit encor en la main, ce qu'il feist, la baisant & luy presentant: mais Monsieur de Mercueur luy rendit incontinent.

Lauardin se faisant paroistre l'espee en la main dans la ruë, & voyant la partie mal faicte pour luy, se sauua dans Chasteau-girō qui tenoit pour eux, n'oubliāt que ses armes, cheuaux & bagage qui y demeurerent.

Les sieurs de Viques & de la Chennais, menerent les fuyards battans iusques au paué de Rennes, & voyāt Monsieur de Mercueur qu'il ne pouuoit loger audit bourg, pour s'estre le feu mis fortuitement en quelques maisons, il alla loger ce soir avec sa prise à deux lieus de là, enuoyant vn Capitaine & vn trompette des siens, & ledit Comte vn trompette seulement, pour recognoistre les morts &

les bleſſez.

Les communes qui auoient prins les armes en faueur de Monſieur de Mercueur, brûllâs de deſir de le ſeruir en l'occaſion qu'ils entendirent ſe preſenter de la venuë du Comte de Soiſſons, marcherent diligemment vers ledit Chaſteau-giron, où n'ayans peu arriuer que le lendemain de la deſſaiçte, marris au poſſible de leur retardement, ſe voulurent reuancher ſur le Chaſteau, d'où par malheur eſtoit ja party Lauardin fort diligent de pourueoir à ſes affaires, & ſ'eſtoit retiré à Rennes, y ayant laiſſé neantmoins pluſieurs Gentilshommes dudit Comte, qui ſ'eſtoient là ſauuez, outre la garniſon ordinaire dudit lieu. Ils ſe reſolurēt donques de prendre ce Chaſteau à quelque prix que ce fuſt, & pour ceſt effect eſleurent pour leur chef le fuſdit Capitaine

enuoyé pour recognoistre les morts.
 Et ayans fait sommer par lescdites trō-
 pettes ceux de dedans de se rendre à
 Monsieur de Mercueur, eux effrayez
 encor de la recente deffaicte, ne pre-
 nans loisir de recognoistre les affie-
 geans qu'ils estimoient estre gens de
 guerre, ils se rendirent sans difficulté
 à cōditiō de pouuoir emmener leurs
 cheuaux, ce qui leur fut accordé: dōt
 sortans, vn des gentils-hōmes dudiect
 Comte de Soissons recogneut les cō-
 munes, dequoy depité, pēsant recou-
 urer son hōneur tua d'vn coup de pi-
 stollet vn de la troupe. Ce qui fist
 tellemēt esmouuoir ces communes,
 que voyans que ceux-cy auoient rō-
 pu la capitulation, ils se ietterent sur
 eux, & de soixante & douze tant gē-
 tils-hommes que soldats, il n'en resta
 en vie que trois blesez, & autant pris
 à mercy.

Entre ceux qui furēt tuez en la def-
 faicte du Comte de Soissons ont esté
 recogneuz, le Viconte de la Fotriere,
 Boisdouillet, la Roche-giffart, Auril-
 ly qui estoit à defunct Mōsieur, Four-
 matière, la Roussiere & autres, iusques
 au nombre de quatre vingts gentils-
 hōmes, & des autres trois eēs en tout.
 Entre les prisonniers sont le Côte de
 Soissons, le sieur d'Auaugour, le Mar-
 quis de Nermoustier, la Roche aux
 Aubiers, le Bouy, Mezocourt, Belle-
 uille, le Capitaine la Chaussée, Vieux-
 pons, le sieur Octauius, Pōtauius, Chau-
 gay, Chiuray, le Brueil & plusieurs au-
 tres, iusques au nombre de soixante,
 dōt la liste n'a peu estre apportee ius-
 ques icy.

De ce braue exploit nous en deuōs
 l'honneur à Dieu chef de la S. Vnion,
 & conducteur des armées Catholi-
 ques, sans frustrer mondit sieur de

Mercueur de la louage que merite sa generosité & vertu, mais principalement la sincerité de ses intétions: lesquelles ayans pour but la seule gloire de Dieu, luy ont faict voüer sa vie & tout ce qui depend de son pouuoir à ceste saincte cause dès le commencement d'icelle, & fermé les yeux à tous les dangers qui se sont presentez lors, que nostre mal estoit plus couuert & violent, le peril eminent, & les remedes beaucoup pl⁹ esloignez, ainsi que peuuent tesmoigner plusieurs bons Catholiques de ceste ville de Paris, qui se sont les premiers iettez à corps perdu en la barque de la S. Vnion, pour sauuer nostre religion du naufrage, dõt elle estoit menacée de fort pres.

F I N.



